

## **Malaysia tempat ke-27 ranking daya saing dunia IMD 2023**

**Astro Awani**

**20 Jun 2023**

**Hasimi Muhamad**

KUALA LUMPUR: Kedudukan Malaysia dalam Ranking Daya Saing Global (WCR) 2023 meningkat lima anak tangga di kedudukan ke-27 berbanding ke-32 pada tahun lalu.

Penambahbaikan kedudukan itu merupakan pengiktirafan terhadap usaha keseluruhan Kerajaan Malaysia dalam mengukuhkan asas ekonomi, dasar dan inisiatif dalam meletakkan negara sebagai destinasi pilihan untuk pelaburan, perniagaan serta perdagangan.

Menteri Pelaburan, Perdagangan dan Industri, Tengku Datuk Seri Zafrul Tengku Abdul Aziz berkata kedudukan tersebut menunjukkan Malaysia mencatatkan peningkatan dalam keempat-empat faktor daya saing, terhadap kesan pandemik, ketidaktentuan dan krisis ekonomi global, serta pelbagai cabaran domestik.

“Kami berbesar hati maklum bahawa Malaysia telah meningkat kepada tempat ke-27 dalam Indeks Daya Saing Dunia. Bagi MITI, apa yang penting ialah bagaimana kita boleh menambah baik lagi.

"Walaupun Malaysia menunjukkan prestasi yang baik dari segi harga, infrastruktur asas dan dasar cukai, kita mesti bersungguh-sungguh menangani isu-isu seperti pembangunan bakat tenaga kerja sedia industri; minda yang mengutamakan digital untuk sektor; pembaharuan kawal selia untuk kemudahan menjalankan perniagaan di peringkat nasional dan sub-nasional; serta mengejar pembangunan mampan," katanya dalam satu kenyataan hari ini.

Sementara itu, kedudukan WCR Malaysia dalam sub-faktor perundangan perniagaan meningkat daripada 50 pada 2022 kepada 45 pada 2023.

Zafrul menambah, MITI percaya usaha untuk meningkatkan daya saing global Malaysia mesti bergantung kepada pendekatan 'seluruh negara' dalam memuktamadkan dan melaksanakan Pelan Induk Perindustrian Baharu 2030 (NIMP 2030).

Katanya, ia berdasarkan strategi awam-swasta bersepadu yang memperkasakan semua pihak kepentingan utama seperti pelabur, perniagaan, Perusahaan Kecil dan Sederhana (PKS) dan rakyat, dengan mengambil kira prinsip kemampanan dan keterangkuman yang menyeluruh.

Laporan WCR Institut Antarabangsa bagi Pembangunan Pengurusan (IMD) adalah berdasarkan 336 kriteria daya saing yang dikategorikan kepada empat faktor: Prestasi Ekonomi, Kecekapan Kerajaan, Kecekapan Perniagaan dan Infrastruktur.

Laporan yang meliputi 64 ekonomi itu, antaranya memperincikan arah aliran daya saing negara berdasarkan prestasi keseluruhan, cabaran pada tahun tinjauan, fakta asas, landskap daya saing dan kedudukan kumpulan sebaya.

**© 2023 Astro AWANI Network Sdn. Bhd. 200001032668(535275-D) All Rights Reserved.**

Source: <https://www.astroawani.com/berita-bisnes/malaysia-tempat-ke27-ranking-daya-saing-dunia-imd-2023-424760>